

Date – 23/01/2025

Time - 18:30 -18:40Hrs

## REGIONAL NEWS BULLETIN

### HEADLINES (EVENING)

1. Mizoram District 9-a Village Council leh Aizawl Municipal Corporation leh Lunglei Municipal Council huamchhunga Local Council inthlan a chuh tumte hming pekluh hun chu vawiin khan a tawp.
2. Mizoram Truck Owners Association (MTOA) leh Mizoram Truck Drivers Association (MTDA) chuan Vairengte leh Sairang inkar National Highway kawng chhia avangin vawiin atangin an ding tan.
3. Netaji Subhash Chandra Bose-a piancham "Parakram Diwas" chu vawiin khan rampumah lawm a ni
4. External Affairs Minsiter Dr.S.Jaishankar chuan US-a phalna lehkha nei lova US-a khawsa India mite chu kir tir leh vek turin sawrkar chu a inhawng reng a ti

<><><>

### VC/LC ELECTION NOMINATION

Mizoram District 9-a Village Council leh Aizawl Municipal Corporation leh Lunglei Municipal Council huamchhunga Local Council inthlan a chuh tumte tan hming pek luh hun chu vawiin khan khar a ni a,

Hming pekluh te hi naktuk chawhma dar 11 atanga endik tan a ni anga, inhnukdawk duh te tan karleh thawhtanni chawhnu dar 3 thleng hun hawn a ni ang.

Aizawl, Lunglei, Champhai, Serchhip, Mamit, Kolasib, Saitual, Khawzawl leh Hnahthial District bakah Aizawl Municipal Corporation leh Lunglei Municipal Council huamchhunga Local Council-ah te thla thar ni 12 ah inthlan neih a ni anga, vote hi chhiar nghal a ni ang.

Lunglei Dist a VC khaw 88 leh Local Council 148 awmna a chuh tur candidate te hming pekluh tawpni anih angin vawiin khan Candidate te chuan an hming an ziak lut fel. Thudawn danin Lunglei South bial Sailen khuaah chuan Congress party chu chuhtu an awm lova ni.

Lungleiah hian Pol.party 3:ZPM, INC leh MNF te chuan veng tinah Candidate tur zawngin nizan thleng a la buai te pawh an awm a ni. Eptu pawl, Congress leh MNF chuan a hrang ve ve in an chuh deuh vek a, Lunglei khawpui LMC area ah chuan ni za inhlawhna awm ta lo, Buhfai man to, kawngpui chhia leh LMC awm tak avanga nunphung danglam ta chungchang te au hla ber pakhat a niin VC term pawh tawi leh Lunglei HPC thiah tumna

awm ni a lang chu ZPM sorkar an beihna a ni ber a, sawhthing lei an harsat dawn vangin sorkar in inthlanna a buatsaih tih te leh sikul naupang exam dawn hnaihah inthlanna buatsaih a ni chu zirlaite ngaihsaklohna a ni ti ten Sorkar an dem a ni.

Hetihlai hian Rorellai ZPM chuan thlai thar lei anih dawn thu leh sorkar in kum 1 na a hmang zo ta a, a tak takin hma a la thei dawn ta a, mipui beiseina atakin a thleng dawn tan tiin an sawi ve thung a ni.

<><><>

CM

Chief Minister Pu Lalduhoma'n Mizoram chhim lama Oil Palm chingtute harsatna sutkian dan tur leh a tul anga chin belhna tur ruahmanna waviin khan Patanjali Foods Limited te a sawi pui.

Chief Minister chuan Pu Ashok Kumar Singh, Chief General Manager & Head, Oil Palm Operations North East leh Pu Tapas Kumar Tripathy, Dy GM, Plantation and Nursery, Patanjali Foods Limited te a kawmna ah Sawhthing, Aieng leh Hmarcha an lei dan tur sawipuiin Oil Palm chingtute harsatna sutkian dan tur leh a tul anga chin belhna tur ruahmanna a sawi pui a, Patanjali Food hian Liapha-ah Oil Palm Mill an din dawn a, kum khat chung vela an inbun fel theih an inbeisei a. Mizoram chhim lam district Serchhip, Lunglei, Lawngtlai leh Siaha district-a oil palm chingtute thar chhuah chu sawrkar rate ding lai angin an leisak dawn a. An mamawh khawp oil palm thar chhuahsa a la awm loh avangin Nursery te siamin a chin belhna lam pawh an umzui dawn a ni.

<><><>

MLP ACT 2019

Mizoram Liquor (Prohibition) Act, 2019 hnuaiah nikum December thla khan Zu kaihhnawihah mi 473 man an ni.

MLP Act 2019 tlawh chhanin nikum khan Excise and Narcotics Department chuan zu kaihhnawihah mi 460 an man a, Mizoram Police in 13 man in a vaiin mi 473 man an ni a, zu rui case ah mi 64 man an awm bawk.

Excise Department leh Mizoram Police man belhkhawm hi December thla chhungin zu bottle sang ruk chuang a ni a, rakzu tam tham tak leh beer bakah rampawn atanga zu lakluh man a ni a, hemi kaihhnawihah hian motor 10 man a ni bawk.

<><><>

LAWNGTLAI

Lawngtlai By Pass Road a tlakdal siam chhe lutuk, kut lawng pawh a kheuh thlak maitheih ni a lang chu waviin khan MJA Lawngtlai District te chuan an hmun ah an enfiah a.

MJA te hi chawhma dar 11 ah By Pass Road hi an thleng a, nizan lama Video darh chu Lawngtlai DC thupekin kawngthlang lam ah khawl hmanga nawrliam vek a lo ni tawh a, Parapet dangte pawh MJA hruaituten an en chin ah chuan tlema rinngam deuhtur awm mahse, a tlangpuia thlir chuan hmanraw thalo, a nih dantur anga hnathawhloh niin an hria a, thuneituten a rang lamin hmalase an duh thu an sawi.

Lawngtlai khawpui helna tur hi November 20, 2020 ah thawhtan niin, March 2025 ah zawhfel tura ruahman a ni a, tunah hian hna hi zawhfel

thawhkhat a ni tawh a, By Pass Road hi KMMTTP kawngpui atanga National Highway 54, 71 RCC Camp a pawhna thleng hian Kilometres 2.27 a thui niin cheng Vaibelchhia 31.14 senna tura ruahman a ni.

<><><>

#### TRUCK OWNER ASSN

Mizoram Truck Owners Association (MTOA) leh Mizoram Truck Drivers Association (MTDA) te chuan Vairengte leh Sairang inkar National Highway kawng chhia avangin vawiin atang khan an lirthei te an dintir a,

MTOA Secretary Pu Dina Tlau chuan vawiin chawhma khan PWD Minister hova kawng chhe zual siamthat ngai tura ngaipawimawh hmasak te sawiho a nih thu sawiin sorkar ah pawh beiseina sang tak an neih thu a sawi a, kawng hi zawh tlaka siam a nih hma loh chuan tlan an tumloh thu sawiin pawl 2 te hmalakna hi mipui ten an thlawp tha hle a a hriat thu a sawi.

Byte of Pu Dina Tlau

MTOA leh MTDA hmalakna hi Mizoram Tipper Assn leh Kolasib District Tipper Assn, Kolasib district chungga truck driver leh Owner Joint Action Committee leh Kawnpui Truck Driver Association ten MTOA leh MTDA hmalakna hi thlawpin an ding ve nghal a ni.

Vawiin khan PWD minister Pu Vanlalhlana chuan Mizoram ei leh bar lakluhna kawngpui ber National Highway NH-6 Kawnpui atanga Khamrang kawng thawm that mek a tlawh a, Pu Vanlalhlana chuan Mipuite harsatna hriaiin Mizoram PWD kawng enkawl ni miah lo ah mawhpurhna an la ni a sawiin mipui leh Lirthei neitute pawhin Sorkar thahnemngaihna hriathiam pui thin se an duh a ti.

Vairengte atanga sairang inkar National Highway NH-6 chu NHIDCL kuta awm niin engemaw hna laklawhna avangin Mizoram State sawrkar chuan mipui mamawhna hriain a enkawl lailawk a ni a ti a. Mizoram Sorkarin a enkawl hnu hian a thawh khat nan he kawngpui thawmthat nan nikum khan cheng Nuai 75 sen a lo ni tawha, nikum vek khan NHIDCL kuta awm leh tura ruahman a nih laiin, NHIDCL te hian an lak tak si loh avangin Mizoram Sorkar chuan State pawisa a remchang ang ang pawt khawmin, vawiin thleng hian mipuite mamawhna hriain a enkawl chhun zawm leh rih ta a ni," a ti.

PWD Minister chuan, National Highway NH -6 thawmthat hna hi ni 20 atang khan a tum hnih nan thawh tan leh a ni a, tun tum ah hian Cheng Nuai 125 ruahman niin february ni 15 a siam zawh tum a ni a, sum ruahman sa hian a daih hmel loh avangin Sorkarah dilbelh leh mek a ni a, ngawrh taka siam mek a ni bawk, a ti.

<><><>

#### AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar hi puan leh a ni ang.

<><><>

#### MAMIT DRUG DISPOSAL

Cheng vbc 2 leh nuai 98 hu ruihhlo Mamit chungga man te chu vawiin khan halral a ni a,

Ruihhlo an halral tak te hi heroin gram 140, Meth kg 22.11 leh Ganja kg 128.25 te a ni a, halralna hun hi District Bawrhsap Pu K Laltlawmlovan a hmanpui a.

District Bawrhsap chuan SP Mamit leh a team te hnenah lawmthu sawiin hma an lak that zarah ruihhlo tam tak man a nih thu sawiin , ruihhlo do kawngah theihtawp chhuah zel turin a fuih a. Mamit chu ram in rin na a awm anih avangin ruihhlo tawlh ruk nan hman a nih thin a, hemi do tur hian police mai ni lo YMA leh tlawmngai pawlte thahnemngai tak a thawk chhunzawm zel turin a chah bawk.

Mamit SP Pu Pukhraj Kamal chuan Mamit district a drugs tibo tur in theihtawpin police chuan hma an lak thu a sawi a, drugs ti lo turin thalaite chu chahin uar takin drugs do kawngah hmalak a tul thu a sawi bawk.

<><><>

#### AR NATIONAL INTEGRATION TOUR

National Integration Tour 2025 nei tura, January ni 17 atanga chhuak Assam Rifle Middle School Aizawl te chu vawiin khan Mizoram an rawn thleng a.

Zirlaite hmasawanna tura ruahman he tour-ah hian zirlai naupang 10 leh anmahni kaihruaitu zirtirtu 3 an kal a, January ni 17-ah Aizawl atanga Guwahati panin zirlaite hi Guwahati khawpui te fan kualpui an nih hnuah, ni 20 khan Shillong-ah in sawn leh in, vawiin January ni 23 hian Guwahati atangin Aizawl rawn letpui leh an ni.

He tour-a kal zirlai te hian an thil hmuh leh fan-te atanga thil thar zir belh tam tak an neih thu an sawi a, Akashvani News zawhna chhangin hetiang tour hi zirlai te tan thil tha tak ni a an hriat thu an sawi.

<><><>

#### PARAKRAM DIWAS

Netaji Subhash Chandra Bose-a piancham "Parakram Diwas" chu vawiin khan rampumah lawm a ni. Kuminah hian a vawikhat nan Netaji-a pianna Cuttack-a Barabati Fort ah Parakram Diwas hi lawm a ni a. Vawiin atanga tanin ni thum chhung lawm a ni ang. He hunah hian ramchhung hmun hrang hrang atangin Netaji hriatrengna leh a sulhnu thil hlu tak takte pholan a ni a. Lalit Kala Academy chuan he hun hi buatsaihin Netaji hlimthla lemziah lian tak an phochhuak bawk a ni.

Prime Minister Narendra Modia chuan Netaji hriatreng nana a thuchahah rammin khawvela eibar dinhmuna ram lian pathumna ni tura hma a sawnnaah Netaji Subhas Chandra Bose-a hnen atangin zirlai tam tak an zir a ti a. Ramchhung mipuite chu ram changkang dinhmuna India siam tura theihtawp chhuah turin a chah a ni.

Heng bakah hian President Draupadi Murmu, Vice President jagdeep Dhankar leh hruaitu hrang hrangten Netaji Subhas Chandra Bose pian cham pualin hriatrengna thu social media lamah an thawn a ni.

<><><>

**MAHARASTRA TRAIN ACCIDENT**

Maharashtra-a Jalgaon district-a rel chesuala thi zat chu 13 an tling tawh. Mitthi zinga 10 hi an nihna tihchian tawh a ni a. Puan tawh angin Maharashtra Chief Minister Devendra Fadnavis chuan rel chetsualna thlenga thi an awm chu pawl atih thu sawiin an chungte hnenah cheng nuai 5 theuh zangna dawmna pek a ni ang a ti a. Hliam tuarte pawh an inenkawlna senso sawrkarin a tum vek dawn tih a puang bawk a ni.

<><><>

**EXTERNAL AFFAIRS MINISTER**

External Affairs Minister Dr.S.Jaishankar chuan US-a phalna lehkha nei loa khawsa India mite chu kir tir leh vek turin sawrkar chu a inhawng reng a ti. Washington DC-a chanchinbumite hmaah he thu hi sawiin India chuan dan dik thlapa pem luh chu a thlawp tih sawiin India thiamna bik leh theihna sang tak tak neite chu khawvel huap pawha eizawmna tha pek an duh thu a sawi a. US leh India te chuan inrintawmna nghet tak an neih thu leh thawhhona pawh an neih that thu a sawi a. Khawvel tana thil tha ti tur leh ram leh hnam ti hmasawn zel chung a thawkdun turin theihtawp an chhuah a ti bawk.

External Affairs Minister chuan Pakistan nena sumdawmna chhonzawm leh turin inbiakna a awm lo a ti a. Kum 2019 khan Pakistan sawrkar chuan India nen sumdawmna hi a titawp tih a sawi bawk a ni.

<><><>